

FPP BizNewz

Jan - May 2023

MANAGEMENT • INVESTMENT • ECONOMICS • ENTREPRENEURSHIP • TECHNOLOGY

BUKIT MERAH
"THE RED FOREST"
PERMATA TERSEMBUNYI DI JERANTUT

TOXIC FRIENDSHIP
WHEN IT'S TIME TO LET GO

GRADUATES
WHO ARE THE URBAN POOR

ARROWS OF THE FAITHFUL
THE IMPORTANCE OF ARCHERY IN ISLAM

**TWIN-TO-TWIN TRANSFUSION
SYNDROME (TTTS)**



Publication Date
1 June 2023

BIJAKSANA ATAU BIJAKSINI?

BIJAKSANA @ BIJAKSINI?

Oleh:

NUR SYIKRI HARUN¹ & FATHIYAH ISMAIL²

¹Akademi Pengajian Bahasa

²Fakulti Pengurusan dan Perniagaan

Universiti Teknologi MARA Cawangan Terengganu

Emel koresponden: nursyikri@uitm.edu.my

Pernahkan anda terfikir tentang perkataan 'bijaksana'? Kenapakah ia disebut 'bijaksana'? Mengapakah bukannya 'bijaksini'? Menurut Pusat Rujukan Persuratan Melayu, perkataan 'bijaksana' bermaksud 'berakal budi', 'arif', 'pandai dan berhati-hati', dan 'cerdik'. Sebagai contoh, "Pegawai penyelidikan itu seorang yang bijaksana". Orang yang bijaksana dikatakan individu yang menggunakan akal budi. Ia adalah kata sifat positif yang seringkali dikaitkan dengan perihal seseorang yang menjalankan tugas atau mengatur hidupnya dengan penuh hati-hati dan pandai.

Namun, mengapakah perkataan 'bijaksini' tidak pernah wujud? Saya percaya ia tiada dalam kamus Dewan

eISSN 2600-9811

71

Bahasa dan Pustaka atau mana-mana kamus atau tesaurus berbahasa Melayu. Ia seolah-olah perkataan yang barangkali diwujudkan oleh penulis seentengnya. Boleh jadi ini kali pertama pembaca pernah mendengarnya. Bunyinya pelik dan tidak pernah didengari, disebut, dieja, atau ditulis.

Itulah hakikatnya. Ia tidak pernah dituturkan oleh sesiapa. 'Bijaksini' itu tidak pernah 'bijak'. Sebab itu ia tidak pernah ada dalam mana-mana halaman buku. Tidak seperti 'bijaksana'. Ia wujud. Ia ada maksud. Ia ada dalam ungkapan dan ucapan. Ia ditulis. Ia digunai pakai. Ia terserap dalam peribadi manusia. Ia dimenifestasikan dalam bahasa lisan dan bahasa tubuh.

Maksud 'bijaksana' adalah memikirkan keadaan dan perihal orang lain. Ia seperti berada dalam kasut, but, selipar, terompah, dan stokin orang lain (Namakan sahaja apa yang anda mahu...). Ia seumpama meletakkan diri dalam perasaan orang lain. Ia seperti menyelami minda dan jiwa orang lain. Itulah maksud 'bijaksana'. Semuanya tentang orang lain; kebaikan orang lain, kebajikan orang lain, kesenangan orang lain, keselesaan orang lain, kemudahan orang lain, perasaan orang lain, dan segala 'mak-nenek' berkaitan orang lain.

Namun, 'bijaksana' mungkin membawa naratif yang berbeza menurut individu berbeza. Pada seseorang, 'bijaksana' itu adalah perihal

memikirkan pahala dan dosa yang akan dibalas ganjarannya di akhirat 'sana' tanpa memikirkan hanya apa yang ada dan didapati di dunia '[s]ini' yang bersifat sementara. Pada sisi lain di pihak manusia berhati durjana, 'bijaksana' bermakna dia pandai mengambil peluang dan kesempatan ketika menikmati kehidupan sejarak azan dan iqamah ini. Yang bekerja pandai mengambil peluang pecah amanah dan membodek bos. Bijakkah? Yang belajar pandai meniru dan menipu demi gred dan segenggam ijazah. Bijakkah? Yang berniat jahat pandai mencuri peluang melakukan jenayah dan noda. Sekali lagi: Bijakkah? Apakah gunanya kalau senang di sini tetapi susah di sana...

Lalu, bagaimanakah pula dengan kalimah 'bijaksini'? Sememangnya wujudkah ia? Kalau ada sekalipun, ia hanyalah perihal seseorang yang selalu memikirkan dan mengutamakan kesejahteraan peribadi. Ia hanyalah cerminan diri sendiri, kepentingan diri sendiri, keuntungan diri sendiri, dan kesenangan diri sendiri. Semuanya tentang di sini; berkisar tentang diri sendiri semata-mata. Ia

bersifat ananiah. Ia memakai pakaian egoistik. Ia bertopengkan individualistik. Kerana itulah perkataan sebegini tidak pernah tertulis. Ia tidak pernah diungkapkan. Ia bukannya maujud. Ia hanyalah racun di atas nama kebijaksanaan.

Ringkasnya, 'bijaksini' itu hanya di sini. Namun, 'Bijaksana' itulah yang sebenarnya. Tetapi apakah pilihan anda? 'Bijaksana'; adil buat semua, atau 'bijaksini' ambil untung sendiri? Tepuk dada tanya iman...

RUJUKAN:

Habiburrahim (2012). Bijaksana vs bijaksini. <http://ashabulislam.blogspot.com/2012/04/bijaksini-vs-bijaksana.html>
 Mohammad Ihsan (Oktober 8, 2020). Bijaksana vs bijaksini. https://www.gurusiana.id/read/ihsan/article/bijaksana-vs-bijaksini-369612?bima_access=0
 Pusat Rujukan Persuratan Melayu (2008-2017). Carian maksud bijaksana. Dewan Bahasa dan Pustaka. <http://prpmv1.dbp.gov.my/Search.aspx?k=bijaksana>





BizNewz 2023
Faculty of Business and Management
Universiti Teknologi MARA Cawangan Terengganu, Kampus Dungun
Sura Hujung, 23000 Dungun, Terengganu, MALAYSIA
Tel: +609-8400400
Fax: +609-8403777
Email: biznewzuitm@gmail.com